

24 Cathedral Road / 24 Heol y Gadeirlan  
Cardiff / Caerdydd  
CF11 9LJ

Tel / Ffôn: 029 2032 0500

Fax / Ffacs: 029 2032 0600

Textphone / Ffôn testun: 029 2032 0660

[info@audit.wales](mailto:info@audit.wales) / [post@archwilio.cymru](mailto:post@archwilio.cymru)

[www.audit.wales](http://www.audit.wales) / [www.archwilio.cymru](http://www.archwilio.cymru)

Drwy'r e-bost

**Cyfeirnod:** DO/FCC/1920

**Dyddiad cyhoeddi:** 22 Ebrill 2020

Annwyl Judith a Steve

## Cynllun Archwilio Blynyddol 2020 – Effaith COVID-19

Mae argyfwng cenedlaethol COVID-19 wedi cael effaith ddigynsail ar y DU a bydd yn cael effaith sylweddol ar waith cyrff cyhoeddus wrth baratoi cyfrifon 2019-20 a'n gwaith archwilio ninnau, yn archwilio ariannol ac archwilio perfformiad.

Oherwydd cyfyngiadau Llywodraeth y DU ar symud a'r lefelau absenoldeb salwch a ddisgwylir, rydym yn deall na fydd modd i lawer o gyrff cyhoeddus baratoi cyfrifon yn unol â'r amserlenni a nodwyd.

Ynghyd â chyflawni cyfrifoldebau statudol yr Archwilydd Cyffredinol, ein blaenoriaeth ni yw sicrhau iechyd, diogelwch a lles staff Archwilio Cymru, eu teuluoedd a rhai ein partneriaid mewn mannau eraill yn y gwasanaeth cyhoeddus yn ystod y cyfnod hynod o heriol hwn.

Mewn ymateb i Gyngor y Llywodraeth a chyfyngiadau dilynol, rydym wedi rhoi'r gorau i bob gwaith ar y safle mewn cyrff a archwilir ac mae ein swyddfeydd ni ein hunain wedi cau. Mae staff Archwilio Cymru yn gweithio o gartref a byddwn yn parhau i wneud pa gynnydd bynnag y gallwn ei wneud tra'n gweithio ac yn ymgysylltu â chi o bell.

Ymrwymwn i sicrhau na fydd ein gwaith archwilio yn cael effaith niweidiol arnoch ar adeg pan mae cyrff cyhoeddus dan bwysau ac yn canolbwyntio ar ddelio ag argyfwng cenedlaethol COVID-19.

## Diweddariadau i'r cynllun archwilio drafft a rannwyd gyda chi ar 12 Mawrth 2020

Yng ngoleuni'r uchod, bydd angen diwygio'r cynllun archwilio drafft a anfonwyd atoch ar 12 Mawrth 2020.

## Archwilio cyfrifon

### Cod Ymarfer Cyfrifyddu CIPFA/LASAAC

Byddwch yn gwybod bod Bwrdd Cod CIPFA/LASAAC yn ddiweddar wedi ystyried Diweddariad arfaethedig i'r Cod ar gyfer 2019-20 a fyddai wedi datgymhwyso rhannau helaeth o God 2019-20. Ar ôl trafod, penderfynodd Bwrdd Cod CIPFA / LASAAC beidio â mabwysiadu'r Diweddariad Cod arfaethedig. Felly, bydd Cod 2019-20 (y Cod) yn gymwys yn llawn ar gyfer eleni. Rydym yn deall bod yr awdurdod yn gweithio tuag at baratoi cyfrifon yn unol â'r Cod llawn.

### Risgiau Archwilio

O ganlyniad i argyfwng cenedlaethol COVID-19, mae angen i ni ddiweddarau ein hasesiad o risgiau archwilio. Mae'r atodlen yn Atodiad A yn disodli Arddangosyn 1 yng nghynllun archwilio 2020.

### Materion archwilio posibl

Rydym yn ymwybodol o bryderon a fynegwyd gan nifer o awdurdodau lleol ynglŷn â gwahanol agweddau ar y cyfrifon.

Ymhlith y meysydd pryder penodol a godwyd gyda ni mae:

- Defnydd cynyddol o amcangyfrifon. O ganlyniad i gloi'r DU, efallai y bydd gofyn i awdurdodau ddefnyddio mwy o amcangyfrifon ar gyfer eu cyfrifon nag y bu angen mewn blynyddoedd blaenorol. Mae ein harchwilwyr wedi arfer â delio ag amcangyfrifon a chymhwyso safonau archwilio mewn perthynas ag amcangyfrifon. Byddwn yn trafod gyda chi y tybiaethau allweddol a'r seiliau tystiolaeth sy'n sail i'r amcangyfrifon a gwnawn hyn yn fuan yn y broses.
- Prisiadau asedau. Mae awdurdodau wedi mynegi pryderon am briswyr proffesiynol yn cymhwyso ymwadiadau i'w prisiadau a'r effaith bosibl ar farnau archwilio. Byddwn yn trafod y prisiadau hyn ac unrhyw ddatgeliadau angenrheidiol sy'n gysylltiedig â'r prisiadau gyda chi er mwyn sicrhau bod y datganiadau ariannol yn gyffredinol yn cyflwyno darlun gwir a theg.
- Prisiadau pensiynau. Oherwydd y symudiadau sylweddol yn y marchnadoedd buddsoddi, mae pryderon a fydd prisiadau a ddarperir gan actwariaid yn dderbyniol. Mae ein proses archwilio yn cynnwys defnyddio actwari ymgynghorol i roi sicrwydd archwilio ynglŷn â'r fethodoleg a'r rhagdybiaethau a ddefnyddiwyd gan actwariaid wrth ddarparu dyddiad ar gyfer datgeliadau IAS19. Byddwn yn adolygu adroddiadau IAS19 eich actwari ac asesiad ein hactwari ymgynghorol ninnau ac yn trafod unrhyw bryderon gyda chi yn gynnar yn y broses.
- Tynnu nodiadau datgelu er mwyn symleiddio'r broses o baratoi'r cyfrifon. Holwyd ni am ein barn ynghylch y posibilrwydd o eithrio nodiadau datgelu

Ile y teimlir mai ychydig o werth y mae'r nodiadau'n ei ychwanegu i ddefnyddwyr y cyfrifon. Mae'r enghreifftiau a ddyfynnwyd yn cynnwys y nodiadau cydnabyddiaeth a datgeliadau'r partïon cysylltiedig. Mae'r nodiadau cydnabyddiaeth yn ofynnol yn ôl statud ac felly ni ellir eu dileu o'r cyfrifon. Gyda golwg ar y nodiadau eraill, tynnwn eich sylw at ddarpariaethau'r Cod sy'n ymwneud â pherthnasedd. Mae'r Cod yn nodi bod hepgoriadau neu gamddatganiadau am eitemau yn berthnasol pe gallent, yn unigol neu gyda'i gilydd, ddylanwadu ar benderfyniadau neu asesiadau y mae defnyddwyr yn eu gwneud ar sail y datganiadau ariannol. Gallai natur neu faint yr eitem, neu gyfuniad o'r ddau, fod y ffactor sy'n penderfynu. Dylai'r Awdurdod ystyried darpariaethau'r Cod sy'n ymwneud â pherthnasedd wrth adolygu'r nodiadau datgelu a thrafod unrhyw bryderon gyda'r tîm archwilio. Ceir rhagor o fanylion am berthnasedd yn y paragraffau canlynol yn y Cod: 1.7.1, 2.1.2.14, 3.3.2.4, 3.4.2.7 a 3.9.2.17.

Os oes gennych unrhyw feysydd eraill sy'n peri pryder, codwch y rhain gyda'ch tîm archwilio cyn gynted ag sydd modd. Bydd ein harchwilwyr yn ceisio bod yn bragmatig ynghylch darparu gwybodaeth a thystiolaeth yn amserol, ac yn dangos cydymdeimlad yn ein cyfathrebu llafar ac ysgrifenedig ac wrth adrodd ar faterion sydd wedi codi yn sgil y digwyddiadau presennol.

Fodd bynnag, rhaid inni barhau i wneud ein gwaith archwilio yn unol â'r safonau archwilio. Byddwn yn ceisio cael digon o dystiolaeth archwilio fel sydd angen i ffurfio barn archwilio ddiamod ar y datganiadau ariannol.

## **Amserlen Archwilio**

Gyda golwg ar ein gwaith ar gyfrifon, rydym yn ymwybodol y gall fod anawsterau o ran cwrdd â dyddiadau paratoi a chyhoeddi'r cyfrifon a osodwyd gan Reoliadau Cyfrifon ac Archwilio (Cymru) 2014. Mae Llywodraeth Cymru wedi nodi na fydd y Rheoliadau'n cael eu diwygio gan eu bod eisoes yn darparu digon o hyblygrwydd i ymdrin ag unrhyw oedi sy'n deillio o COVID-19.

Mae'r Rheoliadau yn ei gwneud yn ofynnol cyhoeddi hysbysiad pan nad yw'r awdurdod yn disgwyl cwrdd â'r dyddiadau a bennwyd gan y Rheoliadau. Rwyf wedi cynnwys manylion pellach yn Atodiad B a hysbysiadau enghreifftiol yn Atodiad C, y bydd yr Awdurdod efallai yn dymuno ystyried eu defnyddio.

Mae'r gofynion ar gyfer arfer hawliau etholwyr o dan Ddeddf Archwilio Cyhoeddus (Cymru) 2004 yn parhau i fod yn gymwys. Mae hyn yn peri rhai anawsterau ymarferol tra mae'r cyfyngiadau cloi yn dal i fod mewn grym e.e. mynediad i'r cyhoedd at gofnodion cyfrifyddu'r awdurdod.

Felly, bydd y tîm archwilio yn trafod amserlen briodol gyda chi ar gyfer archwilio cyhoeddus pan fydd gennym syniad clir o'r dyddiad y bydd y cyfrifon ar gael a phan fydd cyfyngiadau'r cloi wedi'u llacio'n ddigonol.

Bydd y tîm archwilio yn cyhoeddi hysbysiad archwilio maes o law yn nodi'r dyddiad penodedig.

Hwyrach y bydd hyn yn golygu y bydd oedi cyn y gallwn gyhoeddi ein barn archwilio.

Bydd angen inni drafod unrhyw newidiadau i'r amserlenni ar gyfer cynhyrchu ac archwilio cyfrifon gyda chi, ond byddwn yn parhau i weithio mor hyblyg ag y gallwn. Bydd yn hanfodol i'r ymgysylltiad hwn barhau dros yr ychydig fisoedd nesaf, yn erbyn yr hyn a fydd, yn ddiamau, yn gefndir sy'n newid yn gyflym. Fy asesiad i yw y bydd ein gallu i gwrdd â dyddiadau diwygiedig ar gyfer cwblhau archwilio yn dibynnu'n bennaf ar:

- y graddau y mae gweithio ac archwilio o bell yn bosibl os na chaiff cyfyngiadau'r cloi presennol eu codi;
- ansawdd y cyfrifon drafft a'r papurau gwaith ategol a fydd ar gael i ni (fydd yn dibynnu'n rhannol ar y graddau y bydd rheolwyr wedi adolygu'r deunydd hwnnw cyn iddo gael ei archwilio);
- y graddau y bydd staff y corff a archwilir ar gael i ymateb yn fuan i ymholiadau archwilio (o ystyried pwysau posibl absenoldeb salwch, cyfrifoldebau gofawr a llenwi ac yn y blaen);
- y graddau y bydd staff Archwilio Cymru yn parhau ar gael i gynnal y gwaith archwilio; a
- gallu'r rhai sy'n gyfrifol am lywodraethu i ymgynnull (dros y we o bosibl) i gymeradwyo cyfrifon.

Byddwn, wrth gwrs, yn cadw llygad barcud ar yr holl ffactorau hyn yn yr wythnosau sydd i ddod ac yn edrych ar ddewisiadau i oresgyn rhwystrau posibl ar ffordd cwblhau'n brydlon lle bynnag y bo modd, a byddwn yn rhoi gwybod i chi ac i'ch tîm am unrhyw ddatblygiadau yn y maes hwn.

## **Rhaglen Gwaith Perfformio**

Roedd ein cynllun archwilio blynyddol hefyd yn nodi rhaglen o waith archwilio perfformiad yng Nghyngor Sir Ddinbych. Ar 18 Mawrth 2020, ysgrifennodd yr Archwilydd Cyffredinol atoch yn esbonio ei fod, yn dilyn canllawiau'r Llywodraeth, wedi penderfynu rhoi'r gorau i'r holl waith archwilio perfformiad ar y safle dros dro a hynny ar unwaith. Byddwn yn gwneud cymaint o gynnydd ag sydd modd gyda'r gweithgareddau hyn drwy weithio o bell, os yw'n briodol.

Fodd bynnag, bydd argyfwng COVID-19 yn cael effaith anochel ar gyflawni ein rhaglen o waith archwilio perfformiad. Rydym yn adolygu hyn yn barhaus a byddwn yn rhoi gwybodaeth bellach am unrhyw ddiwygiadau i'n rhaglen, amseriadau a chanlyniadau archwiliadau perfformiad pan geir mwy o wybodaeth am hyd cyfyngiadau COVID-19 ac effaith ehangach yr argyfwng ar sector Llywodraeth Leol.

Byddwn yn darparu diweddariadau pellach yn ôl yr angen. Yn y cyfamser, os oes gennych unrhyw gwestiynau, cysylltwch ag un o'n tîm archwilio, os gwelwch yn dda.

Yn gywir

Derwyn Owen  
Cyfarwyddwr Ymgysylltu

## Atodiad A: Risgiau Archwilio Datganiad Ariannol Diwygiedig

Mae'r Arddangosyn canlynol yn cymryd lle Arddangosyn 1 yn y cynllun archwilio drafft a rannwyd gyda chi ar 06 Mawrth 2020.

### Risgiau Archwilio Datganiad Ariannol

Mae'r tabl hwn yn crynhoi risgiau allweddol archwilio'r datganiad ariannol a nodwyd yn ystod cyfnod cynllunio'r archwiliad.

Risg Archwilio	Ymateb Archwilio Arfaethedig
<b>Risgiau Sylweddol</b>	
<p><b>Effaith COVID-19 – risgiau cyffredinol</b></p> <p>Mae argyfwng cenedlaethol COVID-19 yn debygol o gael effaith sylweddol ar yr Awdurdod a'i broses o gynhyrchu cyfrifon. Ymhlith y risgiau posibl mae:</p> <ul style="list-style-type: none"><li>Digwyddiadau dilynol. Mae'r Awdurdod, ar hyn o bryd, mewn perygl o beidio â pharatoi ei gyfrifon yn unol â'r amserlen a osodwyd gan Reoliadau Cyfrifon ac Archwilio (Cymru) 2014. Mae'r terfynau adrodd ansefydlog yn cynyddu'r cyfnod (ac felly'r risgiau cysylltiedig) i ddigwyddiadau ddigwydd rhwng dyddiad y datganiadau ariannol a dyddiad adroddiad yr archwilydd. Bydd canlyniadau'r feirws ar ôl 31 Mawrth 2020 yn gyffredinol yn ddigwyddiadau ôl-fantolen na fyddant yn addasu, ond efallai y bydd angen rhyw fath o ddatgeliad.</li><li>Defnyddio amcangyfrifon. Efallai y bydd yr ansicrwydd a'r oedi a achosir gan y cloi ledled y DU yn golygu nad oes data gwirioneddol ar gael ac y bydd mwy o ddefnydd o amcangyfrifon wrth baratoi'r cyfrifon.</li></ul>	<p>Bydd fy nhîm archwilio yn cymryd y camau canlynol i sicrhau bod y risgiau sy'n deillio o COVID-19 yn cael sylw digonol:</p> <p>Byddwn yn ymestyn cyfnod yr adolygiad o ddigwyddiadau dilynol er mwyn nodi unrhyw ddigwyddiadau dilynol o bwys sy'n gysylltiedig â COVID-19, ac a yw'r rhain wedi cael y sylw dyledus neu wedi'u datgelu'n briodol yn y datganiadau ariannol yn unol â'r fframwaith adrodd ariannol</p> <p>Byddwn yn ystyried a oes meysydd y gallai fod angen i reolwyr ddarparu tystiolaeth bellach ar eu cyfer oherwydd bod natur y mater hwn yn newid yn gyflym.</p> <p>Byddwn yn sicrhau bod newidiadau priodol wedi cael eu gwneud i gydnabod unrhyw ansicrwydd pellach wrth gyfrifo amcangyfrifon cyfrifyddu (gan gynnwys cyfrifiadau amhariad). Byddwn hefyd yn ystyried a yw rhagdybiaethau yn briodol o dan yr amgylchiadau a byddwn yn canolbwyntio mwy ar y meysydd canlynol:</p> <ul style="list-style-type: none"><li>y broses o gau'r datganiad ariannol (yn enwedig cofnodion dyddiaduron a newidiadau eraill a wnaed); a</li><li>gwerthusiad yr archwilydd o gyflwyniad cyffredinol y datganiadau ariannol, gan gynnwys ystyried a wnaed datgeliadau digonol.</li></ul>

Risg Archwilio	Ymateb Archwilio Arfaethedig
<p>Mae'r risg y gallai rheolwyr wrthwneud rheolaethau yn bresennol ym mhob endid. O ystyried y ffordd anragweladwy y gallai gwrthwneud o'r fath ddigwydd, ystyrir bod hon yn risg sylweddol [ISA 240.31-33].</p>	<p>Bydd fy nhîm archwilio yn:</p> <ul style="list-style-type: none"> <li>• profi priodoldeb cofnodion dyddiaduron ac addasiadau eraill a wnaed wrth baratoi'r datganiadau ariannol;</li> <li>• adolygu amcangyfrifon cyfrifyddu am dueddiadau; a</li> <li>• gwerthuso'r sail resymegol dros unrhyw drafodion sylweddol y tu allan i gwrs arferol busnes.</li> </ul>
Meysydd eraill sy'n derbyn sylw archwilio	
<p><b>Dyfarniad McCloud</b></p> <p>Yn 2015 cyflwynodd y Llywodraeth ddiwygiadau i bensiynau'r sector cyhoeddus, gan olygu bod mwyafrif gweithwyr y sector cyhoeddus wedi'u symud i gynlluniau pensiwn newydd yn 2015.</p> <p>Ym mis Rhagfyr 2018, dyfarnodd y Llys Apêl fod y 'mesurau diogelu dros dro' a gynigiwyd i rai aelodau o gynlluniau y barnwyr a'r diffoddwyr tân, fel rhan o'r diwygiadau, yn gyfystyr â gwahaniaethu anghyfreithlon. Ar 15 Gorffennaf 2019 cyhoeddodd y Llywodraeth eu bod yn derbyn bod y dyfarniad yn gymwys i holl brif gynlluniau pensiwn y gwasanaethau cyhoeddus.</p> <p>Mae'r dyfarniad yn debygol o gael effaith arwyddocaol ar y rhwymedigaethau pensiwn a ddatgelir gan yr Awdurdod.</p>	<p>Bydd fy nhîm archwilio'n adolygu'r ddarpariaeth a wnaed mewn perthynas â dyfarniad McCloud ac yn monitro cynnydd o ran datblygu cynigion ar gyfer datrysiad i'w gymhwyso yng Nghynllun Pensiwn Llywodraeth Leol.</p>

Risg Archwilio	Ymateb Archwilio Arfaethedig
<p><b>Amcangyfrifon Sylweddol</b> Bydd paratoi'r datganiad ariannol yn cynnwys nifer o amcangyfrifon sylweddol, megis buddion gweithwyr o dan Safon Gyfrifyddu Rhyngwladol 19.</p>	<p>Bydd fy nhîm archwilio yn:</p> <ul style="list-style-type: none"> <li>• adolygu'r asesiad blynyddol a wneir gan swyddogion ar y sail, y caiff amcangyfrifon eu gwneud arni, a'i ddiwygio yn unol â'r wybodaeth ddiweddaraf;</li> <li>• gwerthuso cymhwysedd, galluoedd a gwrthrychedd yr arbenigwyr a gyflogwyd gan y Cyngor i ddarparu'r amcangyfrifon a gwerthuso'r gwaith a wnaed gan yr arbenigwyr; ac</li> <li>• adolygu dogfennau eraill sy'n cael eu dal i ategu amcangyfrifon ac asesu priodoldeb y penderfyniadau a wnaed gan y Cyngor wrth benderfynu ar yr amcangyfrif.</li> </ul>
<p><b>Ailbrisió Eiddo, Peirianwaith ac Offer</b> Nododd ein harchwiliad o Ddatganiadau Ariannol 2018-19 y Cyngor nifer o wallau yn ymwneud â'r driniaeth gyfrifyddu a ddefnyddiwyd ar gyfer ailbrisió asedau.</p>	<p>Byddwn yn dyfeisio profion archwilio i sicrhau bod yr ymarfer ailbrisió wedi'i gynnal yn briodol a bod adrodd cywir am yr ailbrisiadau gofynnol yn natganiadau ariannol 2019-20.</p>
<p><b>Prydlesi IFRS16</b> Roedd ein cynllun archwilio cychwynnol yn cynnwys cyfeiriad at gyflwyniad disgwylidig Prydlesi IFRS 16 yn 2020-21. Mae hyn yn awr wedi ei ohirio hyd 2021-22.</p>	<p>Bydd fy nhîm yn parhau i adolygu'r sefyllfa.</p>



## Atodiad B: Gofynion Rheoliadau Cyfrifon ac Archwilio (Cymru) 2014

Efallai eich bod yn ymwybodol bod Ysgrifennydd Llywodraeth Leol, Robert Jenrick AS, wedi cyhoeddi yn Lloegr y bydd y dyddiad cau ar gyfer paratoi cyfrifon llywodraeth leol yn cael ei ymestyn i 31 Awst 2020 a dyddiad cyhoeddi'r cyfrifon archwiliedig hyd at 30 Tachwedd.

Bu Archwilio Cymru'n trafod y datblygiad hwn gyda swyddogion Llywodraeth Cymru i weld a fydd cyhoeddiad tebyg yn cael ei wneud ar gyfer Cymru. Mae safbwynt Llywodraeth Cymru (fel y cafodd ei gyfleu i gyrrff llywodraeth leol) ar hyn o bryd fel y'i nodir isod.

### Gofynion Statudol

Nodir y sefyllfa statudol ar gyfer cyrrff llywodraeth leol yng Nghymru yn Rheoliadau Cyfrifon ac Archwilio (Cymru) 2014 (fel y'u diwygiwyd).

### Dehongliad Llywodraeth Cymru

Mae Rheoliad 10 yn nodi'r amserlen ddisgwyliedig ar gyfer paratoi, cymeradwyo ac archwilio'r cyfrifon blynyddol. Oherwydd effaith COVID-19, mae Llywodraeth Cymru yn cydnabod efallai na fydd yn bosibl i bob corff llywodraeth leol gwrdd â'r amserlen hon. Mae Rheoliad 10 (4) yn rhoi digon o hyblygrwydd i gyrrff llywodraeth leol ymdrin ag oedi a achosir gan COVID-19. Mae ei ganllawiau ar y Rheoliadau yn nodi:

“Lle, yn eithriadol, na all ardystiad ddigwydd cyn [31 Mai/15 Mehefin], mae angen cymryd camau i gyhoeddi datganiad sy'n nodi'n glir y rhesymau pam nad yw hyn wedi digwydd cyn y dyddiad hwnnw a chytuno ar ddull gweithredu i sicrhau y gwneir hyn cyn gynted ag sy'n ymarferol ar ôl [31 Mai/15 Mehefin].”

Mae'r canllawiau hefyd yn nodi y dylai'r cyfrifon gael eu cyhoeddi erbyn 31 Gorffennaf/15 Medi, hyd yn oed os nad yw'r cyfrifon wedi cael eu cymeradwyo.

Ar y sail bod digon o hyblygrwydd wedi ei adeiladu i mewn i'r Rheoliadau cyfredol, nid yw Llywodraeth Cymru o'r farn bod angen diwygio'r Rheoliadau.

### Barn Archwilio Cymru a'r effaith ar y broses archwilio

Mae Archwilio Cymru yn cytuno ag asesiad Llywodraeth Cymru bod digon o hyblygrwydd yn bod eisoes yn y Rheoliadau.

Os digwydd i'r cyfrifon beidio â chael eu paratoi yn unol â'r amserlen statudol, dylai cyrrff a archwilir hysbysu eu tîm archwilio a chyhoeddi hysbysiad yn nodi bod yna oedi a'r rheswm dros yr oedi. Ceir enghraifft o eiriad yn [Atodiad C](#).

## Atodiad C: Rheoliadau Cyfrifon ac Archwilio (Cymru) 2014 – awgrym o hysbysiad

### Hysbysiad archwilio lle na all y Swyddog Ariannol Cyfrifol ardystio'r cyfrifon naill ai oherwydd salwch neu oherwydd nad yw'r cyfrifon wedi'u paratoi

Mae Rheoliad 10 (1) o Reoliadau Cyfrifon ac Archwilio (Cymru) 2014 (fel y'u diwygiwyd) yn ei gwneud yn ofynnol i Swyddog Ariannol Cyfrifol Cyngor Sir y Fflint lofnodi a dyddio'r datganiad o gyfrifon, ac ardystio ei fod yn rhoi darlun cywir a theg o sefyllfa ariannol y corff ar ddiwedd y flwyddyn y mae'n ymwneud â hi ac o incwm a gwariant y corff hwnnw ar gyfer y flwyddyn honno. Roedd y Rheoliadau yn ei gwneud yn ofynnol i hyn gael ei gwblhau erbyn 15 Mehefin 2020.

Nid yw'r Swyddog Ariannol Cyfrifol wedi lofnodi ac ardystio'r cyfrifon ar gyfer y flwyddyn a ddaeth i ben 31 Mawrth 2020. Oherwydd argyfwng COVID-19, mae'r awdurdod wedi dargyfeirio adnoddau i gefnogi gwasanaethau rheng flaen allweddol ac nid yw'r datganiad o gyfrifon wedi'i baratoi eto. Bydd y datganiad o gyfrifon yn cael ei baratoi a bydd y Swyddog Ariannol Cyfrifol yn lofnodi ac yn ardystio'r datganiad o gyfrifon pan fydd pwysau uniongyrchol argyfwng COVID-19 wedi cilio.

### Hysbysiad archwilio lle mae'r Swyddog Ariannol Cyfrifol wedi ardystio'r cyfrifon ond nad yw'r corff a archwilir yn cyfarfod ac felly mae'n methu â chymeradwyo'r cyfrifon

Mae Rheoliad 10 (1) o Reoliadau Cyfrifon ac Archwilio (Cymru) 2014 (fel y'u diwygiwyd) yn ei gwneud yn ofynnol i Swyddog Ariannol Cyfrifol Cyngor Sir y Fflint lofnodi a dyddio'r datganiad o gyfrifon, ac ardystio ei fod yn rhoi darlun cywir a theg o sefyllfa ariannol y corff ar ddiwedd y flwyddyn y mae'n ymwneud â hi ac o incwm a gwariant y corff hwnnw ar gyfer y flwyddyn honno. Roedd y Rheoliadau yn ei gwneud yn ofynnol i hyn gael ei gwblhau erbyn 15 Mehefin 2020.

Llofnododd y Swyddog Ariannol Cyfrifol ac ardystio'r cyfrifon ar [dyddiad].

Mae Rheoliad 10 (2) o Reoliadau Cyfrifon ac Archwilio (Cymru) 2014 (fel y'u diwygiwyd) yn ei gwneud yn ofynnol, yn dilyn yr ardystiad gan y Swyddog Ariannol Cyfrifol y cyfeiriwyd ato uchod, bod Cyngor Sir y Fflint yn cymeradwyo ac yn cyhoeddi'r datganiad o gyfrifon a archwiliwyd. Roedd y Rheoliadau yn ei gwneud yn ofynnol i hyn gael ei gwblhau erbyn 15 Gorffennaf 2020.

Oherwydd argyfwng COVID-19, nid yw'r datganiad o gyfrifon wedi'i baratoi eto.

NEU

Oherwydd argyfwng COVID-19, nid yw Cyngor Sir y Fflint wedi cyfarfod i gymeradwyo'r datganiad o gyfrifon.

NEU

Oherwydd argyfwng COVID-19, nid yw archwiliad datganiad o gyfrifon 2019-20 wedi'i gwblhau eto ac nid oes unrhyw farn archwilio wedi'i darparu. Y datganiad o gyfrifon sy'n cael ei gyhoeddi yw'r datganiad o gyfrifon nas archwiliwyd.